# POR UN APROVEITAMENTO INTEGRAL DO MONTE 

# Fruitos, gando, cogumelos, cortiza, plantas, madeira... Todo o que o bosque nos daria para elevar o nível de vida a longo prazo. 

MARISA CASTRO E LUIS FREIRE

Na actưalidade, e coa entrada de España na CEE, esta-se afalar en Galiza de excedentes agricolas con dificuldades para entraren nos mercados europeus; ao mesmo tempo di-se que Europaédeficitáriaen madeira, sobretodo para pasta de papel e taboleiros. Estas ideastevan a plantexar unha política forestal un tanto errada e de miras moi curtas, desde o noso ponto de vista.
Esta-se a pensar nunha millora económica do labrego galego só a base de madeira producida por espécies de rápido crecimiento, sen preocupa-se de saber, se, a longo prazo, os efectos provocados polas novas espécies introducidas sobre o solo, a fauna e flora autóctonas, a paisaxe, etc. son perxudiciais ou non. Non nos damos conta -ou non nos queremos dar- de que estamos a hipotecar o noso meio ambiente natural.
Alguns profisionais do meio forestal, demagoxicamente, din que pouco se pode facer nese senso, xa que a meirande partte do monte galego é propriedade privada e por conseguinte o proprietário, como desexa quitar ò máximo rendimento posibel, usa espécies introducidas que medrạn mais axiñae non as autóctonas e alóctonas que o fan mais lentamente. Pero, non será porque a información que chega a el non é a debida?
En efecto, para conseguir un óptimo aproveitamento do monte este ten que estar arborado; endebén, con que espécie ou espécies debemos facer as repovoacións? ou que espécies é necesário protexer? e con cais podemos quitar mais rendimento sen estragar o terreo?
Unhacousa que está demostrada eque imos tentar de xustificar a continuación é que si se fai un uso integral do monte, este pode proporcionar unha renda maior con outras utilizacións que a producida só pola madeiraestraída de espécies de crecimiento rápido. Salientamos e comentamos algunhas das diversas utilidades posíbeis do que son perfectamente compatibeis coaprodución madeireira, favo-recendo-a incluso.

APROVETAMENTO DE FRUITOS: Nalgunhas zonas de Alemaña estan-se a facer repovoacións con cerdeiras. Estas árvores medran ben e producen uns sabrosos frutos que dan un "superávit" económico engadido ao da madeira, proporcionando asimesmo un alimento aos animais consumidores de fruitos; isto favorece unha expansión e protección das espécies animais, o que poderia levar consigo un aumento da CAZA.


Tamén en Galiza, xa se están a facer repovoacións con castiñeiros e nogueiras. Hoxendia hai variedades e espécies híbridas de castiñeiros resistentes a enfermidade da tinta, que comezan a producir fruitos aos 3 ou 4 anos de seren plantados e medran relativamente pronto.
Xa hai indústrias galegas que recollen esta castaña para a elaboración de confituras (non debemos esquencer os prezos do "marrón glacé"). Ademaiso prezo da madeira de castiñèiro vale entre 3 a 6
veces, segun calidade, mais que a do piñeiro ou a do eucalipto.
Moi semellante é o caso da nogueira que produce fruitos de alto prezo e unha madeira moi apreciada en ebanisteria.
Este tipo de árvores, por seren de folla caidiza ou caduca que se descompón relativamente fácil, fai un importante aporte de nutrientes e favorece a formación do solo.
CRIA DE GANDO: Experiéncias levadas a cabo pola CRIDA en Galiza demostran que é posibel, xa en repovoación relativamente recentes, criar certas espécies de gando do monte. As espécies mais interesantes e rendábeis son as cabras, as ovellas e os cavalos, nalgunhas zonas tamén terian interese os cochos.
Ademais do aporte económico feito polo próprio gando, fan un abonado natural do solo, favorecen a limpeza do sotobosque, eliminando a matorreira e, deste xeito, indirectamente, evitan os incéndios forestais drásticos e intensos.
Non é preciso indicar que o adevesamento é mais factíbel nas repovoacións con árvores de folla caduca como carvallo, castiñeiro, nogueira, etc...
RECOLLIDADECOGUMELOS:Cadavezten mais importáncia este uso do monte, xa que na actualidade se exportan cogumelos desde Galiza para o resto do Estado e Europa por valor de mais de 1.000 millóns de pesetas por ano.
Hai várias empresas adicadas á recollida de certas espécies de setas como boletos (Boletus edulis, B. pinicola, B. erythropus, ...), ligadas a carvallos, castiñeiros e piñeiros principalmente; cantarelas (Cantharellus cibarius), micorrícicas de carvallos e piñeiros; fungos da muña (Lactarius delicosus, L. sanguifluus) e tortullos (Tricholoma flavovirens), recollidos baixo piñeiros.
Para que a presenza de cogumelos sexa notábel é necesário -aparte dunha climatoloxia axeitada- que o bosque esté limpo, sen matas de uces, toxos, etc. Outro xeito de evitar incéndios graves.
Hai dados en parcelas estudadas polo Centro Forestal de Lourizán, nas que se colleron cogumelos por valor de 50.000 ptas. por outono e por Ha...
EXTRACCION DE CORTIZA. Nun tempo non moi Ionzano en Galiza cultivaba-se nalgunhas zonas de climatoloxia suave unha árvore escasa agora, a sobreira. Desta ávore pode-se extraer a cortiza que despois é usada para fabricar trobos, na elaboración
de tapóns de botellas,...
RECOLECCION DE PLANTAS COMESTIBEIS E MEDICINAIS. Nas fragas galegas hai certas espécies que producen fruitos comestíbeis que poderian ser aproveitados, tais como os do frambueso, o érbedo, o arando ou as amoras. Algun deles (as amoras) están sendo adquiridos por indústrias galegas co fin de vendé-los embasados xa para confiteria.
O mesmo ocorre con certas plantas medicinais, as que se poderia favorecer na sua disposición se coidamos o bosque. Estas espécies estan-se a exportar en grandes cantidades desde Galiza, tal é o caso de arnica (Arnica montana), a xenzá (Genciana lutea), a xilvarda (Rucus aculeatus), 0 sanguño (Franhula alnus), etc.; a maioria destas plantas son típicas das fragas. O perigo que corren estas espécies na actualidade é que, ao non estar protexidos os ecosistemas nos que viven, se esquilman moito as povoacións, correndo o risco de chegar incluso a desaparecer.
Estes son alguns dos diversos usos que se poden. dar ao monte, ainda que posibelmente haxa mais.
Sevolvemos á plantación de árvores de crecimento rápido poderian-se facer matizacións. Asi a ninguén se lle ocorre plantar millo a esgallo, sen poñé-lo nunha leira baixo control, sachá-lo, aboná-lo,... 0 mesmo deberia ocorrir coas espécies arbóreas cultivábeis, deste xeito certas espécies como eucalipto ou piñeiro de repovoación non se expandirian indiscriminadamente despois do lume; si se limpao monte -ademais de favorecer o crecimento das árvores- non serían tan graves os efectos dos incéndios forestais e se abonamos a plantación non se esquilmará totalmente o terreo. Solucións sempre hai con boa vontade e uns lixeiros coñecimentos de selvicultura.
É importante non esquencer que ao disfrute dun meio ambiente sán temos direito todas/os e é a obriga dos governos velar porque asi sexa. O mesmo que hai unha lexislación urbanística e non se pode construir unha casa onde e como se quer, apesar de ser o proprietário de terreo, deberia haber unha lexislación forestal que tamén vixiara as plantacións indiscriminadas e sen orde algunha.
A plantación dunhas espécies nun lugardado deberia ir acompañada dun informe que asi o aconsellara, asi como as condicións de mantimento desa explotación.

